


ALAHADY FAHA 27 MANDAVANTAONA - A



TANIMBOALOBOK'ANDRIAMANITRA ISIKA

Ry Kristianina havana, tsy mitsahatra isika fa indrindra moa ao anatin'izao volana oktobra volan'ny raozery hibanjinantsika miaraka amin'i Masina MARIA ireo misterin'ny famonjena antsika ka hahatonga antsika tokoa ho Kristy mpiara-belona amin'olona hitondra ny famonjena. Amin'izao Alahady faha 27 mandavantaona izao dia mampitodika antsika tokoa ireo vakiteny atolotry ny Eglizy amintsika, mampitodika antsika amin'ny fiainantsika, ny firenentsika, ny fiaraha monintsika, ny tanintsika ity, tsy iza tokoa ny tanimboalobok'Andriamanitra fa isika ihany. Izany ny lohahevitra

tian'ny Eglizy hibanjinintsika hahatonga antsika ho Kristy mpiara-belona eo anivon'ny tanimboaloboka izany, indrisy anefa isika ihany no mamotika ny tanimboaloboka fa indrindra isika no mifanapotika.

Ao amin'ny vakiteny voalohany bokin'Izaia mpaminany milaza hoe "*Inona moa no mbola tokony ho natao tamin'ny*

tanimboaloboko, ka tsy nataoko taminy?" Noharian'Andriamanitra ho tsara isika kanefa isika no be siasia ka manalavitra an'Andriamanitra, raha manalavitra an'Andriamanitra ny fiainantsika dia fantaro fa vokadratsy no azontsika ka mifanapotika isika, izay no mbola ampitsiahivina eto ilay torolàlana nomena an'ireo tanora mba ho taranaka mampijoro, manamboatra, manatsara, mandavorary fa sanatria manapotika.

Vakiteny I : Iz. 5, 1-7

Tononkira : Salamo 79

Vakiteny II : Fil. 4, 6-9

Evanjely : Mt. 21, 33-43

Raha maheno ny vakiteny voalohany sy ny Evanjely isika dia mahatsapa fa isika ihany no manapotika ny tanim-boaloboka, mifanapotika sy mifamono isika. Ny fanoharana nataon'i Jesoa milaza izay nasaina nikarakara ny tanim-boaloboka, " *'Inty ny mpandova; andeha hovonointsika ity, dia ho lasantsika ny lovary'*. Noho ny fitiavan-tena, ny fialonana, ny avonavona dia isika ihany no mifanapotika na eo anivon'ny fianakaviana, na eo anivon'ny fiaraha-monina, eo anivon'ny fiaraha-monina, mifanapotika isika nefa aoka ary hahatoky isika fa raha mibebaka tokoa, miova ny fontsika dia ho lasa taranaka manorina sy mandavorary isika. Mibebaha ary isika hihavao ny fiainantsika ka na dia eo aza ny fakam-panahy mahatonga antsika hanilikilika ny hafa dia ho foana raha mibebaka tokoa isika. Ambaran'Andriamanitra amintsika araka ny voalazan'i Md Paoly ao amin'ny vakiteny faharoa : raha ambarantsika amin'ny fivavahana, am-pifonana sy fisaorana marina io fiainantsika io dia izy no andavorary antsika.

Ry Kristianina havana, aoka hanao ny asan'Andriamanitra dia Andriamanitra hanao ny asantsika, izany hoe ny fahamarinana, mijoro amin'ny marina isika ary mila an'izany tokoa ny firenentsika.

Ny tsy fijoroantsika amin'ny marina fa mifamitapitaka, mifandainga, miaina ao anatin'ny risoriso, io no mahatonga antsika mamerina ny fanoharana nataon'i Jesoa io, manapotika sy mamono izay tokony handova ny lanitra, " sambatra ny malemy fanahy fa izy no handova ny tany" hoy ny slogan izay nataontsika, enga anie mba tsy ho slogan fotsiny ho antsika tanora. Ny fanahy no maha olona ka raha io fanahy io no avelantsika hitantana ny fiainantsika dia hiova isika ary izany no tian'i Md Paoly antintraterina amintsika, ny fivavahana tokoa no fiombonana amin'Andriamanitra ary raha miombona aminy isika dia manao ny asany.

Raha misy toetra tokony iezahantsika ka hahatonga antsika ho taranaka manorina fa tsy mandrava dia aoka hanana fahalemam-panahy isika ary dia izay no angatahintsika miaraka amin'i Masina Maria amin'izao volan'ny raozery, mba haka tahaka an'i Jesoa isika ka ho Kristy mpiara-belona amin'ireo manodidina antsika satria raha ny toetran'i Kristy no ao amintsika araky ny voalazan'i Md Paoly " tsy izaho intsony no velona fa i Kristy no velona ato amiko

Ry Jesoa Kristy Tompo ô, izahay tokoa ny tanimboaloboka voalazanao io ary dia izahay no mifanapotika sy mifanaratsy ka mifona aminao izahay, mitalaho ny famindramponao izahay. Enga anie mba hiova tokoa izahay, voleo voatsara izahay ao amponay ao ka amin'izay hifanatsara izahay, hifanasoa izahay, hiara-miasa izahy ka hamokatra voatsara eo amin'ny sahanao ka ho vavolombelonao tokoa izahay hampijoro ny marina, hampanjaka ny rariny sy ny hitsiny, hiezaka hampivelatra ny tena fihavanana marina. Ianao tokoa ilay zanaka novonoin'ireo mpamboly ratsy fanahy, enga anie hiombona aminao tokoa izahay amin'ny vavaka rehetra ataonay ka hahatonga anay koa vonona hanolotena hanatsara ny fiainanay hikatsaka ny soa iombonana eo amin'ny fiainanay andavanandro. Amen

Mompera Arserveka Mgr Benjamin Ramaroson